

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 6  
Marso 21, 2010  
[www.philippinerevolution.net](http://www.philippinerevolution.net)

*Editorial*


# Puspulang ilatag ang mga rekisito para abutin ang estratehikong pagkapatas

**U**maalingawngaw sa bawat sulok ng buong bansa ang tagumpay ng taktikal na opensiba ng mga Pulang mandirigma sa Mansalay, Oriental Mindoro noong Marso 6. Labinlimang pasistang tropa ang nalipol at pito ang nasugatan. Mahigit 15 malalakas na armas ang nasamsam mula sa kaaway at naidagdag sa arsenal ng hukbong bayan. Malugod na ipinagdiriwang ang tagumpay na ito hindi lamang ng mamamayan ng Mindoro, kundi ng buong sambaya-

nan. Nagbigay ito ng inspirasyon at tulak sa buong rebolusyonaryong kilusan na puspusang isulong ang demokratikong rebolusyong bayan hanggang sa tagumpay. Makabuluhan ang tagumpay na ito at iba pang taktikal na opensiba laluna sa harap ng papalapit na ika-41 anibersaryo ng Bagong Hukbong Bayan.

Dinudugtungan at pinatatampok ng mayor na tagumpay ng BHB sa Oriental Mindoro ang sunud-sunod na mga tagumpay ng BHB mula simula ng taon sa iba't ibang panig ng bansa. Rumagasa ang matatagumpay na mga taktikal na opensiba ng BHB sa Abra, Kalina, Mountain Province, Bulacan, Quezon, Palawan, Albay, Camarines Sur, Catanduanes, Sorsogon, Masbate, Eastern Samar, Negros, Agusan del Norte, Agusan del Sur, Surigao del Norte, Surigao del Sur, North Cotabato, Compostela Valley, Davao Oriental, Davao del Sur at iba pang mga prubinsya sa buong bansa.

Matingkad na inilalarawan ng kabitang mga tagumpay na ito ang kabilugan ng kontra-rebolusyonaryong kampanyang Oplan Bantay Laya (OBL) ng rehimeng US-Arroyo at Armed Forces of the Philippines (AFP). Sa kabila ng natamo nating sugat sa harap ng matindi at susteni-



***Mga tampok sa isyung ito...***

**Elite forces ng militar, nilipol ng BHB sa Mindoro**  
PAHINA 4

**Morong 43, patuloy na ginigipit**  
PAHINA 5

**Hacienda Luisita, di bibitiwan ng mga Cojuangco**  
PAHINA 12

dong atake ng kaaway, lalo tayong napanday at lumakas. Tuluy-tuloy tayong humango ng mga aral, nakapagpatatag at nakapagpalakas. Matitinding bigwas ang idinulot natin sa kaaway.

Nasa katayuan ang BHB na maglunsad ng daan-daang taktikal na opensiba sa kasalukuyang taon, kabilang ang ilampung mayor na bigwas laban sa mga pasistang pwersa ng kaaway. Higit pang maparami ang mga ito sa mga susunod na taon. Kaalinsabay, kailangang isakatuparan ang mga tungkulin para sa lahatang-panig na pagsusulong ng digmang bayan at paglalalatag ng malawak at solidong batayan para abutin ang susunod na yugto ng estratehikong pagkapatatag sa kalagitnaan ng kasalukuyang dekada.

Kailangang tukuyin at baklasin ang mga bara at paunlarin ang mga sangkap para tuluy-tuloy at lalong mabilis na mapalakas ang armadong rebolusyonaryong kilusan.

Susi sa mga ito ang pagpapalakas ng pamunuan at buong organisasyon ng Partido at hukbong bayan sa larangan ng ideolohiya, pulitika, militar at organisasyon. Kabilang na rito ang malawakang re-

krutment, pagtitiyak sa konsolidasyon at tuluy-tuloy na pagpapaulad, masinsing edukasyon at pagsasanay at mahusay na ebalwasyon, pagtatalaga at pangangalaga sa mga kadre at pwersa. Kailangang makapagpaunlad ng iba't ibang andana ng pamumuno kapwa sa Partido at hukbong bayan. Dapat pahasayin ang mga sentro ng pamumuno, at gayundin paunlarin ang mga ikalawa hanggang ikatlong linya ng pamumuno.


Dapat mapaulad ang mahigpit na pamumuno sa gera sa antas ng buong bansa, rehiyon, subrehiyon, prubinsya at larangan. Kabilang dito ang paglalabas ng kaukulang mga gabay, masusing pagpapalano at koordinasyon ng mga kampanya, taktikal na opensiba at depensa; pagpapakahusay sa pagkukumbina, pagdidispers at paglilipat-lipat ng mga pwersa at epektibong pagpulisasyon at maksimisasyon kapwa ng mga pwersang bertikal (o mga sentro de grabidad) at mga pwersang horisontal. Kailangang magpakahusay sa pagsubaybay sa bawat kilos ng kaaway at pagpapataas ng kaka-yahan sa mabilisan at pleksibleng paglulunsad ng mga taktikal na opensiba. Kailangang itaas ang di-

siplina at sinupin ang gawaing seguridad. Dapat mahigpit na pamunuan ang mga pampulitikang kampanya at propaganda upang labanan ang mga kampanyang saywar ng kaaway.

Dapat abutin ang lakas-kumpanyang antas sa mga larangang gerilya upang magkaroon ng higit na kakayahan at pleksibilidad ang armadong rebolusyonaryong pwersa sa pagharap, pag-ikot at pagbira sa kaaway at sa pag-agaw at pagmamantine ng inisyatiba sa gera. Kailangang higit na paramihin ang mga lakas-kumpanyang larangang gerilya hanggang masaklaw ang halos lahat ng mga distrito at masaklaw ng Pulang kapangyarihan ang buong kapuluan.

Isang susing sangkap na pinaunlad natin ngayon ang pagbubuklod ng magkakadikit na malalakas na larangang gerilya tungo sa pagtatayo ng mas marami nang mga subrehiyunal na eryang militar, laluna sa mga estratehikong lugar. Karugtong ng mga ito ang pagsisinsin at ibayong paglalarga ng pakikibakang gerilya sa pamamagitan ng pagtatalaga ng platun sa bawat saklaw na munisipalidad, pagpapalaganap ng mga lokal na yunit ng hukbong bayan sa mga baryo at pagdebelop ng higit pang maraming mga pwersang bertikal. Kailangang makapagtayo na rin ng mga yunit partisano ang mga larangang gerilya at palakasin ang operasyon ng mga ito sa mga kalunsuran sa saklaw ng larangan.

Ang kinakailangang ibayong pagpapalaki ng Pulang hukbo ay higit pang mapasisigla sa pamamagitan ng kilusang masa sa gawaing militar. Kailangan ang malawakan at maramihang pagtatayo at pagpapalakas ng mga yunit milisya at mga kwerpo at yunit sa sariling pagdepensa hanggang antas-platun sa mga baryo. Kailangan silang pakilusin sa gawaing paniktik, mga operasyong pangharas, isparo at

 <p>Taon XLI Blg. 6 Marso 21, 2010</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p><a href="http://www.philippinerevolution.net">www.philippinerevolution.net</a></p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa:</p> <p><a href="mailto:angbayan@yahoo.com">angbayan@yahoo.com</a></p>	
<p><b>Ang Ang Bayan</b> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	
<p><b>Nilalaman</b></p>	
<b>Editoryal</b>	
Ilatag ang mga rekisito ng estratehikong pagkapatatag	1
<b>Matatagumpay na opensiba</b>	4
<b>Pananalanta ng pasistang estado</b>	5
Kampanyang masa sa El Niño	9
100 taong pakikibaka ng kababaihan	10
Kababaihan, nagmartas sa Mendiola	10
Kontrobersya sa PGH	11
Reklamo sa pagtaas ng matrikula	11
Hacienda Luisita, ayaw bitiwan	12
Maniobra para panatilihin si Arroyo	13
<b>Balita</b>	14

agaw-arms laban sa kaaway at iba pang gawaing militar sa lokalidad, alinsunod sa atas at gabay ng nauukol na kumand ng hukbong bayan. Sa pagkilos ng ilampung libong mga lokal na armadong pwersa, mapatitingkad ang pangmasang katangian ng digmang bayan at matitiyak ang maramihang rekrutment sa hukbong bayan.


Kailangang magkaroon ng higit na panahon ang mga pwersang horizontal ng BHB para sa mga taktikal na opensiba, iba pang gawaing militar at iba pang mahahalagang gawain sa saklaw ng kanilang pinamumunuang larangan. Sa gayon, hindi malilimita ang gawaing militar sa mga pwersang bertikal at matitiyak ang paglaganap ng gera. Sa layuning ito, dapat paunlarin at pakilusin ang mga lokal na sangay ng Partido at mga aktibistang masa para mahusay na harapin ang mas malaking bahagi ng gawaing masa. Kabilang dito ang maraming aspeto ng gawaing konsolidasyon at pang-organisasyon, pagpopropaganda, kampanyang masa, mga gawaing sosyo-ekonomiko, gawaing alyansa, pag-aayos ng mga tunggalian sa hanay ng mamamayan at marami pang aspeto ng pamamahalang lokal sa kanilang mga baryo, at maging sa pagbubuo ng mga bagong ugnay at pagpapalawak sa mga kalapit na baryo.

Mahalagang mag-angat ng mas maraming lokal na kadre upang gumampan ng mga gawain sa antas-seksyon. Higit pang kailangan ang pangkalahatan ngunit masusing paggabay ng mga namumunong komite at kadre ng seksyon sa lokal na sangay ng Partido at mga lokal na aktibista sa pag-aasikaso ng mga gawaing ito. Dapat ibayong paramihin at palakasin ang mga rebolusyonaryong organisasyong masa, mga organo ng kapangyarihang pampulitika, mga pinunong lokal at mga aktibista na nagsisilbing malaking tulong sa pag-ugnay, pagpu-

kaw, pag-oorganisa at pagmobilisa sa malawak na masa at pangunahing balon ng rekrutment sa Partido at hukbong bayan. Dapat mapaunlad at maitaas na rin ang antas at saklaw ng pagtatayo ng mga rebolusyonaryong organisasyong masa at organo ng kapangyarihang pampulitika hanggang sa kabuuan o kalakhan ng mga munisipalidad at distrito. Kailangan din ang mas maramihang pagpapakat ng mga kadre, pwersa at aktibista mula sa kalunsuran at mga sentrong bayan, kabilang ang mga nagmula sa hanay ng mga manggagawa at nakapag-aral na kabataan.

Malaking salik sa pagpapabilis ng paglawak at pagpapatatag ng baseng masa ang masiglang pagsulong ng rebolusyong agraryo at mga kampanya at pakikibakang masa para sa kapakanan at mga pangangailangan ng masa. Palawakin ang mga ito hanggang sa antas-munisipalidad, distrito at pataas. Pasiglahin sa lahat ng saklaw ang mga kampanyang antipyudal, anti-pasista at anti-imperyalista. Sa pamamagitan ng mga ito, mabilis na maaabot ang mga lugar na dapat masaklaw ng pag-oorganisa at paglalalatag ng rebolusyonaryong kapangyarihang pampulitika.

Sa harap ng paglala ng kahirapan bunsod ng lokal at internasyunal na krisis, dapat tuluy-tuloy na naisusulong ang mga kampanya at pakikibaka para sa reporma sa lupa, pagpapababa ng upa sa lupa at interes sa pautang; pagpapataas ng sahod ng mga manggagawang bukid; pagkakamit ng makatarungang presyo para sa mga produkto nila; pagtatanggol at paggigiit sa mga karapatan at interes nila; at pagpaunlad ng produksyon, mga proyektong sosyo-ekonomiko at iba pang aktibidad sa kapakinabangan ng mamamayan. Ibayong magpapasigla ang mga ito sa mamamayan sa pagtataguyod at ibayong pagsulong ng rebolusyonaryong paki-



kibaka.

Ang lalong umiinit na sitwasyong pampulitika bunga ng nag-iibayong kahirapan at kaapihan ng mamamayan at galit nila sa mga naghahari ay tuluy-tuloy na naggatungan ng kabi-kabilang pakana ng naghaharing rehimen para makapangunyapit sa poder at ng tumitinding alitan sa hanay ng mga reaksiyunaryong nag-aagawan sa kapangyarihan. Nagbabadya ang malaking pagsambulat ng krisis pampulitika na maaaring humanong sa panibagong malawakang pampulitikang unos na maraming ulit na magpapabilis sa pagsulong ng rebolusyonaryong digma at pakikibaka ng mamamayan. Mahalagang masagpang ng rebolusyonaryong kilusan ang napakainam na kalagayang ibinubunsod ng mga ito.

Hindi hihinto ang reaksiyunaryong estado sa paglulunsad ng mga kontra-rebolusyonaryong kampanya ng panunupil. Hanggang sa huling hininga ng bulok na reaksiyunaryo at papet na estado at sistema, sisi-kapin pa rin ng kaaway na gawin ang lahat sa hibang nitong pangarap na puksain ang armadong rebolusyonaryong kilusan. Hanggang sa bisperas ng ganap na tagumpay, patuloy at paulit-ulit na daraan sa matitinding pagsubok at mas malalaki pang hamon ang mga rebolusyonaryong pwersa at mamamayang Pilipino.

Paghandaan at patuloy na pusang labanan at biguin ang marami pang katulad ng Oplan Bantay Laya habang ibayo nating isinusulong ang digmang bayan at inilalata ang mga sangkap sa pag-igpaw nito sa mas mataas na antas. **AB**



## Platun ng *elite* na pwersang militar, nalipol ng BHB sa Mindoro

Isang platun ng mga *elite forces* ng 2nd Infantry Division ng Philippine Army ang nalipol ng Bagong Hukbong Bayan (BHB) sa isang ambus noong Marso 6 sa Barangay Panaytayan, Mansalay, Oriental Mindoro. Ito na ang pinakamalaking kaswalti ng militar laban sa armadong rebolusyonaryong pwersa ngayong taon.

Nagsasagawa ng *clearing operations* ang isang platun ng 23rd Division Reconnaissance Company (DRC) sa pamumuno ni 2Lt. Ronnie Sipsip nang tambangan sila ng mga Pulang mandirigma ng BHB bandang alas-5:30 ng umaga. Nadurog ang buong platun nang mapatay ang 15 sundalo nito at nasugatan ang pitong iba pa. Labing-isang patay at pitong sugatan lamang ang ibinalita ng militar sa midya.

Nakumpiska ng BHB ang 13 malalakas na armas mula sa kaaway.

Kinabibilangan ito ng pitong M16, dalawang M14, dalawang M203 *grenade launcher*, isang M60 *light machine gun* at isang Daewoo K3 *light machine gun*. Nakasamsam din ng mahahalagang kagamitang militar.

Ang matagumpay na ambus ang ikalawang pagkakataon na nalipol ang isang platun ng kaaway sa isla ng Mindoro. Noong Abril 1991, tinambangan at nalipol ang isang 21-kataong platun ng 215th PNP Company na pinamumunuan noon ni Capt. Enrico Salapong.

Bago ang ambus na ito, may ilang mga taktikal na opensiba at labanan nang naganap sa Mindoro. Nakasagupa ng isang platun ng BHB ang 26-kataong platun ng 80th IB ng Philippine Army sa Sityo Tagumpay, Barangay Mapaya, San Jose, Occidental Mindoro noong Pebrero 24. Dalawang sundalo ang nasugatan habang ligtas na nakaatras ang mga Pulang gerilya. Isang araw bago ito, pinarusahan ng BHB ang isang sagadsaring kontra-rebolusyonaryo sa Sityo Imok, Barangay Paclolo, Magsaysay. Inisnayp naman ng mga Pulang mandirigma ang nag-ooperasyong tropa ng 4th IB sa Barangay Tumbaga, Mansalay noong Pebrero 17. **AB**

### Sundalo napatay, 3 nasugatan sa ambus

Isang sundalo ng 69th IB ang napatay nang pasabugan ng BHB ng kanilang sasakyan habang binabagtas niyon ang pagitan ng Barangay Paradise Embac at Paquibato District Proper sa Davao City noong hapon ng Marso 12. Tatlo pang sundalo ang naiulat na nasugatan nang tangkain nilang kunin ang isang sasakyang ginagamit sa kampanya ni Speaker Prospero Nograles na kinumpiska ng BHB. Si Nograles ay isa sa mga pangunahing alipures ni Gloria Arroyo.

Bago ito, tinambangan ng isang yunit ng BHB sa Negros Occidental ang isang platun ng 12th IB noong gabi ng Marso 11. Isang elemento ng CAGU ang napatay habang nasugatan ang isa pang pwersang paramilitar. Nangyari ang ambus sa Sityo Tagaytay, Barangay Camalandaan, Cauayan. Nakasamsam dito ang BHB ng isang M14. **AB**

### 25th IB, pinarusahan

Apat na sundalo ang napatay at di mabilang ang nasugatan nang ambusin ng Conrado Heredia Command ng Bagong Hukbong Bayan sa Southern Mindanao ang 70-kataong Alpha Coy ng 25th IB na pinamumunuan ni 1Lieutenant Inocencio. Ang ambus na tumagal nang isang oras ay inilunsad noong Marso 5 habang nag-ooperasyon ang mga sundalo sa Purok 7, Barangay Salvacion, Monkayo, Compostela Valley.

Ang inambus na yunit-militar ay bahagi ng tropang nag-ooperasyon sa iba't ibang barangay sa Diwalwal na bantog sa reserbang ginto.

Parusa ang ambus sa 25th IB dahil sa pagpapagamit nito sa mga pulitikong *warlord* na may-ari ng malalaking minahan ng ginto sa lugar at kasosyo ng mga dayuhang minahan. Lalong dumalas ang pag-ooperasyon ng 25th IB mula nang buksan ng gubyrnong Arroyo ang Higan-teng Bato sa Diwalwal bilang panibagong *gold reserves site*. Inilalatag ng militar ang daan para sa mga dayuhan at lokal na kumprador na nagkukumahog na makapagbukas ng mga minahan dito.

Ang mga elemento ng 25th IB ay nagsisilbing pribadong *goons* ni-na Joselito Brilliantes, bokal ng Compostela Valley at Manuel Brilliantes, meyor ng Monkayo na kapwa tumatakbo ngayong eleksyon. Ang mga Brilliantes ang may-ari ng JB Management and Mining Corp.

Kasabay ng pagtutulak nito ng kandidatura ng mga Brilliantes, lantad ding nangangampanya ang 25th IB para sa manok ni Gloria Arroyo na si Gilbert Teodoro.

Matapos ang ambus, gumanti ang 25th IB sa pamamagitan ng panggigipit sa mga sibilyan sa lugar. Noong Marso 7, hinarang ng mga elemento ng Bravo Coy ng 25th IB ang siyam na magsasaka sa isang tsekpoynt sa Km. 56 sa Barangay Pasian, tinutukan ng baril at kinumpisa ang dala-dala nilang mga pagkain. **AB**

# Patuloy na ginigipit ang Morong 43


**P**atuloy ang walang habas na pagyurak sa karapatang-tao ng Morong 43 at ang panggigipit sa kanila ng Armed Forces of the Philippines (AFP) at ng mga reaksyunaryong korte. Ang Morong 43 ay tumutukoy sa 43 manggagawang pangkalusugan na dinakip noong Pebrero 6 sa Morong, Rizal at inakusahang mga kasapi ng Bagong Hukbong Bayan. Sa kabila ng malawakang pagtuligsa sa paglabag sa proseso at karapatang-tao, patuloy na ikinukulung ng AFP ang Morong 43 sa Camp Capinpin sa Tanay, Rizal.

Ibinasura ng Court of Appeals (CA) ang petisyon ng Morong 43 para sa *writ of habeas corpus* noong Marso 10. Ayon sa CA, hindi na maaring magkaroon ng *writ* ang mga kamag-anak ng 43 manggagawang pangkalusugan dahil nasampahan na ang mga detenido ng kasong kriminal sa korte. Ayon pa sa CA, kahit na sinasabing may mga paglabag sa mga karapatan ng mga biktima, burado na ang mga ito ng mga kasong kriminal na isinampa laban sa kanila at ng paglalabas ng mga *commitment order* ng militar para sa patuloy nilang pagkakakulong.

Ginamit na basehan ng CA sa hindi paggagawad ng *writ* ang isang doktrinang ginamit noong panahon ng batas militar kung saan maituturing na ligal ang pagkulong sa isang detenido oras na siya

ay masampahan ng kaso kahit pa iligal ang ginawang pag-aresto sa kanya.

Samantala, samutsaring panggigipit ang ginagawa ng militar sa mga detenidong manggagawang pangkalusugan. Noong Marso 1, palihim na inilipat ng AFP ang tatlo sa kanila sa hindi pa tukoy na lokasyon. Ang tatlo ay sina Ellen Carandang, Cherrielyn Tawagon at Valentin Paulino. Una silang inalis sa kanilang mga kulungan madaaling araw ng Marso 1, ibinalik noong umaga at muling kinuha noong alas-2 ng hapon kasama na ang kanilang mga gamit. Hindi ipinaalam sa kanilang mga kamag-anak at abugado ang paglilipat sa tatlo. Nitong ikalawang linggo ng Marso, isinama sa tatlo ang dalawa pang detenido—sina Jennylyn Pizarro at John Mark Barrientos. Kasabay ng



patuloy na sikolohikal at mental na tortyur, inaakit din sila ng mga militar ng mga suhol at espesyal na mga pribilehiyo, para makipagtulungan sa militar laban sa iba pa.

Patuloy ding nahihirapan ang mga abugado, kamag-anak at mga nagmamalasakit na grupo na ma-kausap ang mga biktima. Paisa-isang detenido lamang ang pinapayagang kumonsulta sa kanyang abugado sa bawat pagkakataon.

Ayon kay Atty. Romeo Capulong, abugado ng 43, inaalok ng pera at tinatakot ng militar ang mga biktima at kanilang mga pamilya para tumanggi na sila'y tinortyur at sumang-ayon sa akusasyon ng militar na sila'y mga kasapi umano ng BHB. Pinipilit din silang putulin ang serbisyo ni Capulong bilang abugado at tanggapin ang ibang abugadong pinili ng militar.

Nitong Marso 18, tahasang tumanggi ang militar na iharap ang Morong 43 sa nakatakdang pagdinig ng Commission on Human Rights. Pinagbabawalan din ng militar ang Karapatan at Gabriela, pati na ang mga abugadong kunekta-do sa mga organisasyong ito, na dumalaw sa mga biktima.

## Ilitaw si Ka Bea!

**M**ariing kinundena ng BHB-Southern Mindanao ang 26th IB ng Eastern Mindanao Command dahil sa paglabag nito sa mga karapatan ni Aiza "Ka Bea" Ligawas, 21, at sa internasyunal na mga batas sa digma. Si Ka Bea ay isang probisyonal na kasapi ng BHB na kumikilos sa ilalim ng tim sa gawaing masa ng Alejandro Lanaja Command-Front 3 Operations Command ng BHB.

Inaresto ng militar si Ka Bea noong Pebrero 27 sa Sityo Kilangkob, Barangay Kaigangan, Veruela, Agusan del Sur. Hindi nagtagal matapos siya arestuhin, pinagsuot siya ng unipormeng militar at ginawa siyang giya sa mga operasyon. Pagkatapos, dinala siya sa hindi pa tukoy na lugar. Hanggang sa kasalukuyan ay hindi pa inililitaw ng militar si Ka Bea.

AB

AB



# Panggigipit sa mga progresibo, tumitindi

**U**miigting ang hasasment sa mga progresibong partido at organisasyon habang papalapit ang eleksyon sa Mayo 10. Pinakamatindi ang hasasment sa mga syudad at sentrong bayan ng Metro Manila, Southern Tagalog at Mindanao.

Sa Valenzuela City, nagkampo ang mga elemento ng 73rd Squad ng Philippine Air Force sa mismong gusaling kinalalagyan ng upisina ng tsapter ng partidong Anakpawis sa syudad. Sinabi ni Carlos Maningat, *public information officer* ng KMU, kaanib ng Anakpawis na minamanmanan ng mga sundalo ang mga aktibidad ng progresibong partido. Pinipigilan din nila ang ilang myembro nito na dumalo sa mga pagpupulong sa kanilang upisina. May ilang reklamo rin na ang mga sundalo ay nag-iikot sa buong syudad upang sabihan ang mga tao na huwag iboto ang nasabing partido, taliwas sa pagbabawal na makialam ang AFP sa eleksyon.

Idinadahilan ng mga sundalo na nasa komunidad sila upang tumulong lang umano sa paglilinis ng mga kalsada at magsilbing mga bantay sa lugar kaugnay ng darating na eleksyon. Ang totoo'y nag-

kalat na ang mga elementong militar sa mga maralitang komunidad sa Metro Manila mula pa noong Enero. Sa Balut at Isla Puting Bato sa Tondo, pagala-gala ang mga di-unipormadong elemento ng Civil Military Operations ng AFP. Nagbabahay-bahay sila, kinukunan ng litrato at tinatanong ang mga residente hinggil sa kanilang pagkatao at kung sinu-sino ang mga lider at myembro ng GABRIELA sa komunidad.

Sa ilang barangay sa Taguig City, ipinaskil ang mga poster na may mga larawan nina Satur Ocampo ng Bayan Muna at Liza Maza ng Gabriela Women's Party na nagsasabing "mga kandidato ng New People's Army sa *partylist*". Sa katabing pader naman ay naroon ang mga poster ng berdugong heneral na si Jovito Palparan, na kumakandidato rin ngayon para sa Senado.

Sa Sorsogon, nagbabahay-ba-

hay din ang mga sundalo simula ngayong Marso para tugisin ang mga myembro ng Bayan Muna, Anakpawis, GABRIELA, Kabataan Partylist at ACT Party. Noong Pebrero 23, kinumpronta ng isang Maj. Arnal Manjares ang isang grupo ng mga boluntir na nangangampanya para kina Satur Ocampo at Liza Maza at sinapak ang isa sa kanila sa mukha. Iwinasiwas ni Manjares ang kanyang pistola at binantaang papatayin ang mga boluntir.

Sa Calamba City, hinaras naman ng mga elemento ng 202nd Bde ang mga myembro ng Bayan Muna sa Laguna noong Marso 7. Dumating sa Sityo Kabute, Barangay Real sa Calamba City ang mga sundalo sa pamumuno ng isang Lieutenant Ansino upang maglunsad daw ng *feeding program* sa lugar. Pero pagdating nila roon ay hinahanap nila ang mga kasapi ng Bayan Muna. Tumanggi ang mga residente na papasukin sa kanilang lugar ang mga sundalo. Binarikadahan nila ang mga pasukan at labasan ng komunidad kaya napwersang umalis ang mga sundalo kinabukasan.

Sa Mindanao, pinagtatanggal ng mga sundalong nakasuot-sibilyan ang mga poster at iba pang materyales na pangampanya nina Ocampo at Maza sa Cagayan de Oro at Iligan. Sa Baganga, Davao Oriental, aktibong nangangampanya ang mga elemento ng 67th IB laban sa mga progresibong partido at kandidato. Katuwang naman ng 10th ID sa Southern Mindanao si General Palparan sa pagkakalat ng lason laban sa mga lokal na progresibong kandidato. Si Palparan, na nakabase ngayon sa Davao City ay nagpapatuloy sa kanyang kampanyang paninira sa mga progresibong lider at aktibista. **AB**

## Bahay ng upisyal ng Bayan Muna, hinagisan ng granada

**H**inagisan ng dalawang granada ng dalawang taong sakay ng motorsiklo ang bahay ng panlalawigang lider ng partidong Bayan Muna sa Aklan nitong Marso 19 ng umaga. Walang nasaktan pagkatapos sumabog ang isang granada sa likuran ng bahay ni Fernando Balamero sa Barangay Sta. Cruz-Biga-a, Lezo, Aklan. Hindi sumabog ang isa pang granadang pumasok sa bahay pero sumabit ito sa isang kabinet.

Si Balamero, reeleksyunistang konsehal ng bayan ng Lezo, ay nangangampanya para kina Satur Ocampo at Liza Maza ng Makabayan Coalition at Nacionalista Party. Kinundena ni Ocampo ang pang-aatake at isinisi niya ito sa padron ng pang-aatake sa mga aktibista at mga kritiko ng administrasyong Arroyo. **AB**

# Abusong militar sa Samar

**L**aganap ang pang-aabuso ng militar sa mga interyor na bayan ng prubinsya ng Samar.

Sa San Jose de Buan, isang magsasaka ang dinukot ng mga sundalo, tinortyur at sapilitang pinag-giya sa operasyong militar. Si Bertino Maestre, 60, taga-Sityo Salvacion, Barangay San Nicolas, San Jose de Buan ay dinampot ng mga elemento ng 34th IB kasama ng kanyang syete anyos na anak at pilit na isinama sa kanilang mga operasyon mula Marso 2-4. Ayon kay Maestre, pinipilit siya ng mga sundalo na ituro ang mga kampo ng Bagong Hukbong Bayan (BHB). Nang wala siyang maituro, sinakluban ng mga sundalo ng plastik na supot ang kanyang ulo at pinagbugbug sa harapan mismo ng kanyang anak. Tinukoy ni Maestre ang ilan sa nagtortyur sa kanya na mga sundalong nagngangalang "Angel" at "Francisco" at isang Lieutenant Latonio.

Bago ito, dinukot din ng mga Samantala, ibinunyag naman ng mga upisyal ng Barangay Nagpapacao at Del Rosario sa kanug-nog na bayan ng Matuguinao ang

pang-aabuso ng mga pinagsanib na elemento ng 63rd IB, 34th IB at 83rd Division Reconnaissance Coy. Anila, bigla na lamang pumapasok at humihimpil sa baryo ang mga nag-ooperasyong sundalo na hindi man lamang nagpapaalam sa naturang mga sibilyang upisyal.

Gayundin, nadadagdagan ang paghihikahos ng mga magsasaka dahil naaapektuhan ang kanilang pagtatrabaho at malayang pagkilos bunga ng pilit na ipinatutupad ng mga sundalo na *curfew* sa lugar. Ayon din sa mga upisyal ng barangay, ginagawa ring pananggalang ng mga sundalo ang mga sibilyan. Isinasama sila sa mga operasyon at pinapauna ng mga sundalo sa paglalakad ang mga barangay tanod upang hindi sila birahin ng BHB.

Ikinagagalit din ng mga upisyal ng barangay ang kawalang aksyon si Mayor Jocella Dy ng Matuguinao kahit na makailang ulit nang ini-reklamo ng mga magsasaka sa munisipyo ang pang-aabuso ng mga sundalo. AB


## Mga sibilyan, ginagawang panangga ng 10th ID

**H**ayagang paglabag sa internasyunal na makataong batas at ng mga protokol sa digma ang pagtatayo ng Armed Forces of the Philippines (AFP) ng mga detatsment at kampo ng militar sa loob ng mga sibilyang komunidad. Ilan sa mga kampong ito ay 500 metro lamang ang layo sa mga lugar na makapal ang sibilyang populasyon.

Sa Southern Mindanao sa partikular, umaabot sa 306,637 sibilyan ang direktang apektado at pirming nasa panganib dahil sa lapit ng mga kampo ng militar sa kanilang mga tirahan.

Sadyang nagtatayo ang AFP ng mga kampo sa gitna ng mga sibilyang komunidad para magamit nito ang mamamayan bilang panangga laban sa pang-aatake ng Bagong Hukbong Bayan (BHB).

Dahil din sa lapit ng mga elemento ng reaksyunaryong militar sa mga komunidad, maraming kaso ng paglabag sa karapatang-tao ang nagaganap, laluna ang sapilitang pagpapasapi sa mga grupong paramilitar tulad ng CAGU. Sa mga komunidad ng Lumad, gumagamit ang AFP ng mga paramilitar na lider mula sa hanay ng mga pambansang minorya bilang patunay umano na tanggap ng mamamayan dito



ang presenya ng militar. Nagrerek-rut din ang AFP ng mga sibilyang ahente para maniktik sa kanilang mga kababaryo, manggulo at wasakin ang pagkakaisa ng mamamayan sa lugar.



Sa Davao City, may minamanti-ning siyam na detatsment ang militar—tatlo sa Toril, dalawa sa Calinan at apat sa Paquibato. Apektado rito ang 76,766 sibilyan. Labas pa ang mga detatsment sa mga himpilan ng 10th ID sa Panacan at Task Force Davao sa Sta. Ana Wharf.

Sa Davao del Norte, may isang detatsment ang militar sa Carmen at tatlo sa Asuncion. Apektado rito ang 3,305 sibilyan.

Sa Compostela Valley, mayrong 78 detatsment-militar sa mga bayan ng Compostela, Mabini, Maco, Maragusan, Mawab, Monkayo, Montevista, Nabunturan, New Bataan, Pantukan at Laak. Apektado rito ang 160,314 na sibilyan.

Sa Davao Oriental, 28 ang mga detatsment-militar na matatagpuan sa mga bayan ng Baganga, Banaybanay, Boston, Cateel, Lupon, San Isidro at Manay. Apektado rito ang 59,424 na sibilyan.

Sa Trento, Agusan del Sur at Lingig, Surigao del Sur ay may dalawang detatsment ang militar. Apektado rito ang 6,828 sibilyan.

Partikular sa Boston, Cateel, Lingig, Trento at Monkayo, may mga detatsment o instalasyon ang 72nd Cadre Battalion (CB), 23rd CB, 36th IB, 25th IB, 1105th Police Mobile Group (PMG), 1401st PMG, Philippine National Police, grupong panatikong Pulahan at mga pribadong hukbo ng mga *Brilliantes*, isang pamilya ng mga *warlord* na pulitiko sa Compostela Valley.

Lahat-lahat ay may 123 detatsment-militar sa mga sibilyang komunidad.

Sa takot ng AFP na matarget ng umiigting na mga taktikal na opensiba ng BHB, gumagawa ito ng ganitong mga hakbang na sadyang nagsasapanganib sa buhay ng mga sibilyan. **AB**

## Pilipinong tagasalin, pinatay ng mga sundalong Amerikano?

**I**sang Pilipino na natagpuang patay sa kampo militar sa Marawi City ang pinangangambahang pinagmalupitan at pinatay ng mga sundalong Amerikano. Ang biktima na si Gregan Cardeno, 33 taong gulang, ay ilang araw pa lamang na nagtrabaho bilang tagasalin para sa mga sundalong Amerikano.

Ayon sa Philippine National Police (PNP), hatinggabi ng Pebrero 2 ay nagbigti si Cardeno sa kampo ng 103rd Infantry Brigade ng Philippine Army sa Marawi City, Lanao del Sur. Kobre-kama umano ang ginamit niya sa pagbibigti.

Ngunit naniniwala ang pamilya at mga kamag-anak ni Cardeno na siya ay pinatay. Ito ay batay na rin sa mga salaysay ng biktima sa kanyang asawa na pinagmamalupitan at pinagsasamantalahan siya ng mga sundalong Amerikano.

Umaga ng Pebrero 2 ay naktanggap ng mga *text* at tawag sa ang asawa ni Cardeno na si Myrna. Umiiyak si Cardeno na nagsabing tawagan ang ahensyang nagpasok sa kanya sa trabaho para bawiin na ang kontrata at makaalis na siya sa kampo ng militar. Hindi raw siya dinala sa tunay niyang destino kundi ipinasok sa baraks ng mga sundalong Amerikano kung saan siya lamang ang Pilipino.

Humingi ng tulong ang pamilya ni Cardeno sa Kawagib, isang grupong nagtataguyod ng karapatang-tao sa Mindanao. Nagsiyasat ang Kawagib sa kampo kung saan namatay si Cardeno. Sinamahan ito ng Commission on Human Rights (CHR) at mga progresibong organisasyon. Hiniling ng pamilya ni Cardeno na ipakita ang kwarto kung saan siya natagpuang patay, pati ang mga nilubid na kobre-kama na ginamit umano niya sa pagbibigti. Subalit ayaw ipakita ni Capt. Michael Kay at mga upisyal

ng 103rd Bde ng US Army ang mga ebidensya sa katwirang mayroon daw silang sariling imbestigasyon.

Natagpuang may mga sugat si Cardeno sa ulo, sa katawan, hita, kamay at braso.

Nagdududa rin ang pamilya ni Cardeno sa pahayag ng mga upisyal ng Philippine Army. Maging ang *autopsy* ng National Bureau of Investigation (NBI) ay pinagdududahan din. Hindi nakasaad dito ang ilang detalye sa kalagayan ng bangkay ni Cardeno katulad ng pamamaga ng kanyang bayag at pagbuka ng kanyang puwitan. Tumagal din nang isang buwan bago maipadala sa NBI sa Maynila ang ulat sa pangyayari.

Nagtataka rin ang pamilya ni Cardeno dahil hubad at nakashorts na lamang ito nang nasa punerarya na. Taliwas ito sa nakita nilang larawan ng bangkay na kinuha sa eksena ng krimen ni SPO3 Ali Guibon Rangiris ng PNP-Marawi City. Sa litrato ay nakasuot si Cardeno ng berdeng *T-shirt*, maging na pantalon at bahagyang nakalitaw ang kanyang *brief*. Nabura rin maging ang mga larawan, rekord ng mga mensahe at tawag sa kanyang *cellphone*.

Iginigiit ng pamilya ni Cardeno na gumawa ng panibagong *autopsy* ang CHR sa bangkay niya. Nakatakda rin silang magsampa ng kasong *obstruction of justice* sa mga upisyal ng 103rd Brigade at mga sundalong Amerikano dahil sinira nila ang mga ebidensya. **AB**



## Kampanyang masa sa El Niño

**S**a mga rehiyong hinahambalos ngayon ng matagal na tagtuyot da-la ng El Niño, ang Cagayan Valley ang siyang pinakamatinding tinamaan. Batay sa ulat noong unang bahagi ng Marso, umaabot na sa P5.1 bilyon ang kabuuang halaga ng nasisirang mga produktong palay, mais at pangisdaan sa rehiyon. Nangasira na rin pati ang mga gulayan. Sa bayan ng San Mateo, Isabela, imported na munggo na ang ibinebenta sa palengke dahil wala nang naaning munggo ang mga magsasaka.

Sa kabila ng gayong katinding pananalasa ng El Niño, wala pang ibinibigay na tulong sa mga magsasaka ang guberno. Hanggang sa plano pa lamang ng pamumudmod ng bigas at delata ang hakbang nito. Partikular sa Isabela, antas-sarbey pa lamang ang nagagawa ng mga gubyernong munisipal para tingnan kung gaano umano kalawak ang epekto ng tagtuyot. Nagpahiram sa mga magsasaka ang pamahalaang prubinsyal ng 50 poso ng tubig. Sa kunsiderasyong ang prubinsya ay isa sa pinakamalalaking lalawigan sa bansa, kulang na kulang ang mga poso ng tubig na ito na ipinamimigay sa mga piling tao lamang. Isa pa, kahit may bomba ng tubig ang isang magsasaka ay wala namang makukuhang tubig

sa mga sapa at ilog.

Dahil nangamatay na ang lahat ng pananim, maraming pamilya ang dumaranas ng gutom. May ulat na daan-daang magsasaka ang pumapasok sa kagubatan para mang-uha ng yantok na ibinebenta nila ng P5 kada sampung pye. Sa isang bahagi ng Central Isabela, 300 magsasaka ang isang linggong nangangahoy sa kagubatan. Ang iba nama'y napipilitang mag-*carabao logging*.

Noong Marso 4, nagtungo ang mga magsasaka mula sa Cagayan Valley sa Metro Manila at naglunsad sila ng mga kilos-protesta sa upisina ng Department of Agriculture sa Quezon City. Pinamunuan ito ng Danggayan dagiti Mannalon ti Isabela (DAGAMI), Kagimungan-

Cagayan Chapter at Danggayan-Cagayan Valley. Ang lahat ng mga organisasyong ito ay kaanib ng Kilusang Magbubukid ng Pilipinas (KMP).

Sa kabilang banda, ikinakasa ngayon sa rehiyon ang kampanyang isulong ang kagalingan ng mamamayan sa panahon ng mga kalamidad. Unang sisingilin ng mamamayan ang guberno sa papel nito noong nananalasa ang mga bagyong Ondoy at Pepeng at ang pagpapabaya ng guberno sa agrikultura sa kalagayang ang Cagayan Valley ang isa sa pinagmumulan ng malaking bulto ng bigas sa bansa. Iba pang kaugnay na mga isyu ang pangungurakot sa pondo habang binibigyang-daan ang mga proyektong sumisira sa kalikasan. Tampok dito ang malakihang pagtotroso at pagmimina na kasabwat sina Sen. Juan Ponce Enrile at malalaking kumpanyang imperyalista.

Igigiit naman ng mga organisasyong masa ang sumusunod:

- Di pagbayad ng upa sa isang anihan ng mga magsasakang 20% pataas ang napinsalang pananim sa kalamidad. Kapag 50% pataas ang naging pinsala, hindi babayaran ang upa sa dalawang anihan.

- Sa mga inuupahang lupa ng mga magsasaka na natabunan dahil sa kalamidad, kukwentahin ang gastos sa pagsasaayos ng lupa at iaawas ito sa kabuuang bayad o upa sa lupa sa karaniwang anihan.

- Pagbura sa interes ng utang kapag napinsala ng kalamidad at pagpapaliban ng bayad sa prinsipal ng utang kapag 50% pataas ang nasira sa pananim.

- Pagbura sa bayad sa irigasyon ng National Irrigation Administration at Small Water Impounding Projects, isang sangay ng Department of Agriculture na nagtatayo at nagpapatakbo ng maliliit na dam para sa mga sakahan. **AB**

# Isandaang taong pakikibaka ng kababaihan

**M**ilitanteng ipinagdiwang ng mga progresibo at rebolusyonaryong kababaihan ang nagdaang Pandaigdigang Araw ng Kababaihang Anakpawis noong Marso 8.

Espesyal ang naturang pagdiriwang dahil okasyon din ito ng ika-100 anibersaryo ng pagkakapasa ng resolusyon sa Ikalawang Kumperensyang Pandaigdigang ng Sosyalistang Kababaihan na nagdedeklarang espesyal na araw ng kababaihan ang Marso 8. Ito ay sa inisyatiba ng nangungunang komunistang babae noon na si Clara Zeitkin. Nang idaos ang naturang kumperensya sa Copenhagen, tatatlong bansa pa lamang sa buong mundo ang kumikilala sa karapatan ng kababaihan na bumoto at napakalaganap pa ng pagtrato sa mga kababaihan bilang segunda klaseng mamamayan sa batas at lahat ng larangan.

Isang siglo matapos noon, marami na ang nakamit na mga makabuluhang tagumpay ang progresibo at rebolusyonaryong kababaihan sa buong mundo. Naigiit na ng kababaihan ang kanilang karapatan para bumoto at mahalal sa halos lahat ng bansa sa buong mundo. Mula noon, nakamit na ng kababaihan ang kanilang batayang karapatan para organisahin ang kanilang mga sarili at igiit ang mga usaping mahahalaga sa kanila at sa buong lipunan. Nasa pusisyon silang isulong ang kanilang mga karapatan para sa edukasyon, trabaho at pagkakapantay-pantay sa iba't ibang larangan. Sa loob ng isang siglo, puspusan at walang sawa ang kababaihan para baguhin hindi lamang ang kanilang mababang katuruan kundi ang lipunang nagluluwal at nagpapanatili sa ganitong kalagayan.

Batid ng mga progresibong kababaihan na hindi makakamit ang tunay na kalayaan at pagkakapantay-pantay sa ilalim ng bulok na

sistemang panlipunan na kinapalooban nila ngayon.


Sa mahihirap at atrasadong bansa, pinakatinatamaan ang kababaihan sa palagiang krisis pangkabuhayan na bumabayo sa mga lokal na ekonomya. Ginagampanan nila ang pinakamabababang uri ng trabaho, kapalit ng halos wala o napakababang sahod. Ipinamapalit sila sa kalalakihan sa panahong kailangang babaan ang mga pangkalahatang antas ng sahod. Sa mga sakahan, itinuturing na libre ang kanilang lakas-paggawa. Dagdag dito, marami sa kanila ang pinagsisilbi bilang mga utusan o alipin sa mga panginoong maylupa.

Sa mga kapitalistang

bansa, karamihan ng mga manggagawang kababaihan ay tumatanggap ng sahod na mas mababa sa kalalakihan. Dumaranas sila ng diskriminasyon sa iba't ibang paraan sa loob ng mga upisina at pabrika.

Para panatilihin kimi ang kababaihan, ginagamit laban sa kanila ang karahasan sa iba't ibang antas at larangan. Magpahanggang ngayon, laganap ang paniniwala at kultura na dapat pumaloob ang kababaihan sa awtoridad ng naghaharing uri, ng kanilang mga pamilya at kanilang mga asawa. Ginagamit ang

pinakabrutal na mga paraan tulad ng panggagahasa at sekswal na karahasan para tiyakin ang kanilang pagkalupig. Hindi kaila na ang karahasang ito na lumalabag sa batayang mga karapatan hindi



## Kababaihan, nagmartsa sa Mendiola

**M**ahigit 5,000 kababaihan at mamamayan, sa pangunguna ng Gabriela at Gabriela Women's Party ang naglunsad ng kilos-protesta sa harap ng Malacañang noong Marso 8. Mula sa iba't ibang sektor ang mga nagmartsa. May mga kabataan, manggagawa, migrante, maralitang-lunsod at mga magsasaka. Nakiisa sa kanila ang mga progresibong kandidato, iba pang mga pulitiko at personalidad.

Dala ang panawagang "Kababaihan magkaisa, labanan ang krisis at pampulitikang karahasan," idineklara nilang Pambansang Araw ng Protesta para sa Kababaihang Pilipino ang Marso 8.

Nagkaroon din ng katulad na mga protesta sa mga lunsod ng Davao, Cebu, Baguio, Iloilo at Bacolod at iba't iba pang mga lugar sa Southern Tagalog at Bicol. Sa labas ng bansa, naglunsad ng kasabay na mga aktibidad ang kababaihang migrante sa Hong Kong, Amsterdam sa The Netherlands at US.

AB

lamang bilang babae kundi bilang tao ay ginagamit ng naghaharing uri at kanilang mga armadong galamay laluna laban sa kababaihang nasa mabababang uri at yaong may lakas na loob na lumban.

Sa Pilipinas, pinasisidhi ng kasalukuyang krisis sa ekonomya at pulitika ang kahirapan at pang-aaping dinaranas ng kababaihang Pilipino. Malaon na silang biktima ng maka-imperyalistang mga patakaran ng liberalisasyon, pribatisasyon at denasyunalisasyon ng rehimeng Arroyo. Gayundin, biktima sila ng pampulitikang karahasan sa ilalim ng kontra-mamamayang Oplan Bantay Laya.

Kalahati ng mga walang trabaho ay kababaihan. Marami sa kanila ang naloloko ng mga iligal na rekruter na nangangako ng disentang mga trabaho sa labas ng bansa. Kalakhan sa 12 milyong migranteng manggagawang Pilipino ay babae. Dagdag sa mababang pasahod at napakasamang kundisyon sa paggawa, marami sa kanila ang dumaranas ng pisikal at sekswal na pang-aabuso sa kamay ng kanilang mga amo. Sa kanayunan, umaabot sa 70% ng mga magsasaka at manggagawang bukid ay kababaihan. Dinaranas nila ang mga pinsalang dulot ng mga patakaran ng liberalisasyon, walang pakundangang importasyon ng mga produktong agrikultural at pangkalahatang kapabayaang reaksiyong estado sa agrikultura.

Iginigiit ng kababaihang Pilipino ang disentang pamumuhay sa pamamagitan ng sapat na trabaho, pagkain sa hapag-kainan, mayayos na pabahay at mga serbisyong panlipunan tulad ng edukasyon at kalusugan. Ang paglaban para sa mga ito ay nakakawing sa pakikibaka upang wakasan ang atrasado at mapang-aping sistema. AB

*Para sa pribatisasyon*

## Pagpili ng bagong direktor ng PGH, pinanghihimasukan ng Malacañang

**H**indi maitago ang papel ng Malacañang sa kontrobersyal na pagtatalaga ng bagong direktor ng University of the Philippines-Philippine General Hospital (UP-PGH). Sa pinakahuling mga pulong ng Board of Regents (BOR), kapulungang namamahala sa pamantasan, garapal na nagmaniobra ang mga kagawad na hinirang ni Gloria Arroyo para harangin ang pagtatalaga kay Dr. Jose Gonzales na siyang suportado ng mga kinatawan ng mga mag-aaral, guro, kawani at alumni sa kapulungan. Nais sana ng Malacañang na muling itataga si Dr. Carmelo Alfiler na nasa pangatlo nang termino bilang direktor ng ospital at personal na kaibigan ni Arroyo.

Ang katunaya'y pormal nang naihalal si Gonzales para maging direktor ng ospital sa pulong ng BOR noong Disyembre 18, 2009. Bago ganapin ang botohan ay iginiit ni Abraham Sarmiento, isa sa mga kagawad na hinirang ni Arroyo, na huwag pabotohin si Charisse Bañez, kinatawan ng mga estudyante, dahil hindi na raw siya nakaenrol at gayo'y hindi na mag-aaral ng pamantasan. Gayunman, nang pagbotohan ang usapin ay nanaig ang para sa partisipasyon

ni Bañez at naging mapagpasya ito para mahalal si Gonzales.

Pero noong Disyembre 23, nagsumite ng protesta si Sarmiento ukol sa resulta ng halalan at muli niyang iginiit ang kawalan ng karapatan ni Bañez na lumahok sa botohan. Katapusan naman ng Disyembre nang utusan ng Malacañang si Emmanuel Angeles, tagapangulo ng Commission on Higher Education at ng BOR, na si Alfiler ang suportahan.

Dahil dito, ipinagpapaliban

## Reklamo sa pagtaas ng matrikula

**K**inalampag ng Kabataan Partylist at NUSP ang Commission on Higher Education (CHED) dahil sa kawalang aksyon nito sa mga reklamo ng pagtaas ng matrikula sa kolehiyo. Ayon sa NUSP, walang nagawa ang CHED para maawat ang mga may-ari ng paaralan na magtaas ng matrikula.

Samantala, nag-walkout ang 1,000 mag-aaral ng Polytechnic University of the Philippines (PUP) noong Marso 19 upang tutulan ang nakaambang pagtaas ng kanilang matrikula. Nagmartsa sila mula PUP Sta. Mesa hanggang Mendiola sa Maynila. Aabot sa 2,000% ang itataas ng matrikula (P200 kada unit ang panukalang pagtaas mula sa dating P12 kada yunit) na sisingilin sa susunod na pasukan sa mga estudyanteng nasa *first year* ngayon. Mayroon ding iba pang mga bayarin na planong singilin. Nakatakda rin ang kanilang malaking pagkilos sa darating na Marso 29 sa pagpupulong ng Board of Regents (BOR) ng kanilang pamantasan. AB

ang paghirang kay Gonzales hangga't hindi umano nareresolba ang reklamo ni Sarmiento. Sa muling pagpupulong ng BOR noong Pebrero 5, namaniobra ng mga alipures ng Malacañang ang pagpapawalambisa sa paghirang kay Gonzales. Sa panibagong botohan, nahalal na direktor ng PGH si Dr. Rolando Enrique Domingo na siya nang sinuportahan ng palasyo. Si Domingo ay nauna nang idineklarang hindi kwalipikado sa pusi- syon noong Disyembre.

**Pribatisasyon ang ugat.** Lumilitaw na ang nasa likod ng pagmamaniobra ng Malacañang para makuha ang liderato ng PGH ay isang milyun-milyong pisong kontrata ng pagpapaupa ng ilang pasilidad ng ospital sa pribadong sektor. Ayon sa pinal na kontrata, pauupahan ng UP-PGH sa Daniel Mercado Medical Center (DMMC) ang Dispensary Building nito sa loob ng 25 taon sa halagang P202 kada metro kwadrado. Ang tatlong palapag na gusali ay may kabuuang lawak na kulang-kulang 5,000 metro kwadrado.

Tinututulan ng All-UP Workers' Alliance (AUPWA) ang kontrata ng pagpapaupa dahil dehado anila roon ang PGH. Ayon kay Jossel Ebesate, *national executive vice president* ng AUPWA, P456 kada metro kwadrado ang upa ng Philippine National Bank sa parehong lokasyon mula pa noong dekada 1990. Ikinababahala rin ng alyansa na kukumpitensyahin ng DMMC ang botika ng PGH na nag-aambag ng P24-P30 milyon taun-taon sa pondong pangkawanggawa ng ospital at nagpapasweldo sa mahigit 200 empleyado. Luging-lugi ang PGH sa P12 milyong taunang upa ng DMMC sa unang limang taon ng kontrata. Hindi pa kasama sa kwentang ito ang iba pang operasyon tulad ng sa laboratoryo, *radiology* at *diagnostic exam* na kukumpitensyahin din ng DMMC. **AB**

## Hacienda Luisita, di bibitiwan ng pamilyang Cojuangco

**B**inatikos ni Rep. Rafael Mariano ng partidong Anakpawis si Benigno "Noy" Aquino III, kandidato ng Liberal Party sa pagkapresidente na pumopostura lamang para sa tunay na reporma sa lupa ngunit walang tunay na interes na ipatupad ito.

Ang reaksiyon ni Mariano ay kaugnay ng pahayag kamakailan ni Aquino sa isang panayam sa telebisyon na ang una niyang gaganin sakaling manalo sa pagkapangulo ng bansa ay ang pamamahagi sa mga magsasaka ng lupain ng Hacienda Luisita Incorporated (HLI).

Anang progresibong kinatawan, na tagapangulo rin ng Kilusang Magbubukid ng Pilipinas, ang pangangako ni Aquino ng repormang agraryo ay para lamang isulong ang kanyang kandidatura sa darating na eleksyon. Ang totoo, ang pahayag ni Aquino ay kinontra ng kanyang pinsang buo na si Fernando Cojuangco, ayon sa isang artikulong lumabas sa *New York Times* kamakailan.

Ayon kay Cojuangco, *chief operating officer* ng Azucarera de Tarlac at ng Jose Cojuangco and Sons, hindi pabor ang angkanng Cojuangco na ipamahagi sa mga kasamâ ang mahigit 4,500 ektaryang lupain ng Hacienda Luisita. Aniya, ang nababagay sa industriya ng asukal ay ang kaayusang asyenda. Ang gayong matigas na pagpapahayag

na di kailanman bibitiwan ng mga Cojuangco ang kanilang malawak na asyenda ay malinaw na nagpapakita ng kahungkagan ng mga pahayag ni Aquino tungkol sa usapin ng Hacienda Luisita.

Kinastigo rin ni Mariano si Aquino sa pagmamayabang niya na kumita na sana ng P3 bilyon ang pamilyang Cojuangco-Aquino sa pagbebenta ng 4,500 ektaryang asyenda, kung talaga umanong wala itong pagmamalasakit sa interes ng mga magsasaka. Ayon kay Aquino, babayaran muna ng pamilya nila ang mga utang ng asyenda bago ipamahagi ang lupa sa

mga kasamâ. Nais palabas ni Aquino na may malambot na puso ang pamilya nila at dapat pang magpasalamat ang mga magsasaka sa kanilang kabaitan, ani Mariano.

Gayunpaman, hindi mapasisinungalingan ng pamilyang Cojuangco-Aquino ang katotohanan, sabi ni Mariano. Ginamit ng pamilya ang kabaitan umanong ito para masakerin ang mga magsasaka at pag-samantalahan at pagkaitan sila ng kanilang karapatan sa lupa, anang progresibong kinatawan. **AB**



# Mga hakbang para sa pananatili ni Arroyo, kinukumpleto na

**P**aspasang kinukumpleto ng pangkating Arroyo ang mga susing sangkap sa iba't ibang pakana nito hindi lamang para makapanatili sa poder si Gloria Arroyo lampas ang kanyang kasalukuyang termino, kundi pati para matakasan niya ang kanyang mga pananagutan sa bayan.

Pinakahuli sa mga hakbang ng pangkatin ang desisyon ng Korte Suprema nitong Marso 17 na nagpapahintulot kay Arroyo na magtagala ng bagong punong mahistrado kapalit ng magreteritong pinuno ng kataas-taasang hukuman. Hinihingi na ang listahan ng mga nominado ng Judicial and Bar Council para makapili na si Arroyo ng hihirangin niyang kapalit ni Justice Reynato Puno. Ipinasusumite ito ni Arroyo isang linggo bago ang takdang pagreteriro ni Puno sa Mayo 17. Ang JBC ang kapulungang may upisyal na tungkuling magsala sa lahat ng aplikasyon at rekomendasyon para sa mga pwesto sa Korte Suprema.

Taliwas ang gayong desisyon sa naunang kapasyahan ng Korte Suprema noong 1998. Paglabag ito sa probisyon ng konstitusyon ng guberno na nagbabawal sa nakaupong presidente na maghirang ng mga bagong punong upisyal 60 araw bago ang eleksiyong presidensyal hanggang sa pagtatapos ng termino ng pangulo. Kung susundin ang reaksyunaryong konstitusyon, ang bagong halal na presidente ang siyang dapat pumili ng kapalit na punong mahistrado. Pero dahil sa Hunyo 30 pa uupo ang bagong presidente, awtomatikong hahalili muna ang pinaka-senior na mahistrado.

Ang problema ni Arroyo ay hindi niya kontrolado si Justice Antonio Carpio, ang pinaka-senior sa Korte Suprema. Idineklara na rin ni Carpio na sakaling piliin siya ni Arroyo ay hindi niya ito tatanggapin

dahil naninindigan siyang labag ito sa konstitusyon. Plano ngayong ipalit ni Arroyo kay Chief Justice Puno si Justice Renato Corona, dating *chief of staff* at tagapagsalita ni Arroyo. Si Corona ang pinakamatapat na alipures ni Arroyo sa Korte Suprema. Sa buong panahon niya rito, lahat ng pusisyong pinanigan niya ay yaong pabor sa interes ni Arroyo.


Naghahabol ngayon ang maraming sektor ng rekonsiderasyon ng Korte Suprema kaugnay sa desisyong ito. Kabilang dito ang mga abugado, organisasyong nagtatangol sa konstitusyon at pwer-sang progresibo at anti-Arroyo.

Inuulan na rin ng protesta ang desisyon ng Korte Suprema. Nitong Marso 19, nagrali ang iba't ibang grupo sa harap ng korte para batusin ang anila'y karuwagan ng mga mahistradong naglabas ng gayong desisyon. Kabilang sa mga nanguna sa protesta si Bayan Muna Rep. Teddy Casiño; Sen. Francis Pangilinan, myembro ng Judicial and Bar Council; Solita Monsod, dating pinuno ng NE-DA; at Adel Tamano, abugado at kandidato sa pagkasenador. Sinunog naman ng mga myembro ng Kabataan Party-list ang isang *tarpaulin* na may litrato ng siyam na mahistrado ng Korte Suprema na naglabas ng desisyon.

Nauna pa rito, tiniyak na rin ni Arroyo ang mahigpit niyang hawak sa pamunuan ng Armed Forces of the Philippines (AFP) at mga susing kumand nito.

Nitong Marso 8, sa halip na palawigin na lamang ang termino si Gen. Victor Ibrado upang ang mahahalal na bagong pangulo na ang hihirang sa kapalit, itinalaga na ni Arroyo bilang bagong hepe ng AFP ang paborito niyang heneral na si Lt. Gen. Delfin Bangit. Noong Marso 12, hinirang naman ni Arroyo si Maj. Gen. Reynaldo Mapagu bilang hepe ng Philippine Army, kapalit ni Bangit. Hinirang din niya si Rear Admiral Feliciano Angue bilang hepe ng AFP National Capital Region Command (NCRCOM).

Ang lahat ng bagong hirang ni Arroyo na mga upisyal-militar ay myembro ng Philippine Military Academy Class 1978, na mahigpit na inaruga ni Arroyo bilang *adopted member* nito, at sa gayo'y naging matapat sa kanya. Ang iba pang myembro ng Class 1978 na naitalaga na ni Arroyo sa iba't ibang namumunong pusisyon sa AFP ay sina Lt. Gen. Oscar Rabena, hepe ng Philippine Air Force; Lt.



Gen. Roland Databali, hepe ng Southern Luzon Command; Lt. Gen. Ralph Villanueva, hepe ng AFP Central Command; Brig. Gen. Romeo Prestoza, hepe ng ISAFP (Intelligence Service of the Armed Forces of the Philippines); at Director Roberto Rosales ng Metro Manila Police Office na sinasabing siyang ipapalit kay PNP Chief Jesus Versoza.

Samantala, usap-usapan ngayon ang pag-arangkada ng Oplan August Full Moon na sinasabing pakana para dayain ang eleksyon upang maipanalò ang mga pinapaborang kandidato ni Arroyo, mai-kasa ang pagbabago sa konstitusyon at makaupo na bilang *prime minister* si Arroyo sa ilalim ng bagong sistemang parlamentaryo.

Kung hindi ito umubra, sinasabing babaling ang kampong Arroyo sa pagpapakana ng kabiguan ng eleksyon para maging sangkalan sa deklarasyon ng *state of emergency* kundi man tahasang batas militar, at patuloy na paghawak ni Arroyo ng poder bilang "pangulong pantransisyon." Inamin na rin ng bagong Deputy Spokesperson ni Arroyo na si Charito Planas na kung mabigo ang eleksyon at di malinaw kung sino ang hahawak ng kapangyarihan, hahawakan ito ng militar.

Nauna na itong sinabi ni Senate President Juan Ponce Enrile, na naging administrador ng batas militar noong panahon ng diktadurang Marcos. Susi sa gayong mga plano ang pagtatalaga kay Norberto Gonzales para hawakan ang Department of National Defense, at kina Bangit, Mapagu, Prestoza at iba pa sa AFP, para patuloy na mahawakan ni Arroyo ang kapangyarihang militar. Susi naman ang paghirang kay Corona bilang punong mahistrado ng Korte Suprema para sa pag-aayos ng ligal na basbas sa anumang maniobra ni Arroyo. **AB**

## 6 na grupo sa *party list* ni Arroyo, ipinatatanggal

NAGPIKET sa tapat ng tanggapan ng Commission on Elections (COMELEC) nitong Marso 15 ang Kontra-Daya at mga kasaping organisasyon at ipinanawagan ang pagtatanggal sa anim na grupo sa *party list* na anila'y pinopondohan ng gubyernong Arroyo.

Tinukoy ng Kontra-Daya na ang sumusunod ay mga makaadministrasyong grupo sa *party list*: Bata Iwas Droga (BIDA), Adhikain ng mga Dakilang Anak ng Maharlika (ADAM), Agbiag Timpuyog Ilocano (AGBIAG), Babae para sa Kaunlaran (BABAE KA), League of Youth for Peace and Development (LYPAD) at Kalahi Advocates for Overseas Filipinos (KALAHÍ). Anila, ang mga ito ay may kuneksyon at binigbigyan ng pondo ng gubyernong Arroyo. Sa partikular, ang BIDA ay pinopondohan ni Chairman Ephraim Genuino ng PAGCOR (Philippine Amusement and Gaming Corporation) at nakaugnay sa Dept. of Education at Danger-

ous Drugs Board. Ang ADAM naman ay nasa ilalim ni Department of Energy Undersecretary Zamzamin Ampatuan na siyang unang nominado ng grupo.

Ayon mismo sa isang nabunyag na memo, direktang pinopondohan ng palasyo ang Agbiag, Babae Ka, Kalahi at Lypad.

Sinabi ni Fr. Jose Dizon, *convenor* ng Kontra-Daya, na ang mga grupo sa *party list* na ito ay binuo nina Arroyo para sa kanyang ambisyong makaupo bilang kinatawan ng ikalawang distrito ng Pampanga at Speaker ng Mababang Kapulungan sa kalaunan. Dagdag pa niya, nilabag ng naturang mga grupo ang batas kaugnay sa pagbabawal sa pagpasok ng mga grupong kunektado at pinopondohan ng gubyerno. Sinabi rin ni Dizon na mayroon pang 40 mga grupo sa *party list* na sinasabing pinopondohan ng gubyerno o kaya ng mga militar at malalaking pulitiko na dapat tanggalin ng COMELEC.

## Singil sa *graduation*, tinututulan ng Kabataan Partylist

MARIING iginiit ni Kabataan Partylist Rep. Raymond Palatino ang ang pagbabawal sa pagsingil ng *graduation fee* sa mga estudyanteng magsisipagtapos ngayong taon. Ayon kay Palatino, dapat i-monitor ng Department of Education (DepEd) ang mga eskwelahan naniningil ng bayad sa *graduation*. Maraming reklamo ang natatanggap ng kanilang partido tungkol sa mga nakalulusot pa rin na mga eskwelahan na sapilitang naniningil.

Ayon sa Kabataan Partylist, umaabot sa 40 pampublikong paaralan ang sapilitang naniningil ng *graduation fee* na nagkakahalaga ng ₱100-500 bawat estudyant-

te. Sinabi ni Palatino na ang solusyon sa ganitong usapin ay ang paglalaan ng sapat na badyet ng pamahalaan sa lahat ng gastusin ng mga estudyante. Kaugnay nito, hinamon ni Palatino ang bagong katatalagang Secretary of Education na si Mona Valisno na tugunan ang isyung ito. Sinugod naman ng National Union of Students in the Philippines (NUSP) ang tanggapan ng DepEd noong Marso 19 upang iprotesta ang patuloy na paniningil ng *graduation fee* sa mga paaralan. Tinatakot pa maging ang mga magulang na kung hindi makakabayad ang kanilang mga anak ay hindi sila makapagmamartsa sa entablado.

## Deklarasyong *state of calamity* sa Mindanao, kinwestyon

KINWESTYON ng mga syentista ang pagdedeklara ni Gloria Arroyo noong Marso 11 ng *state of calamity* sa Mindanao. Ayon sa Agham (Samahang Nagtataguyod ng Agham at Teknolohiya para sa Sambayanan), ang hakbang na ito ay maling tugon sa krisis sa enerhiya at paglulustay lamang ng pondo.

Ang hakbanging ito na umano'y tugon sa umiiral na krisis sa enerhiya sa isla ay nagpapahintulot sa mga upisyal ng mga bayan, lalawigan at lunsod na gamitin ang 5% ng kanilang Internal Revenue Allotment (IRA). Maglalaan din ang pambansang pamahalaan ng ₱10 bilyong para sa agarang pagbili o

pag-upa ng mga *generator* na hindi na idadaan sa proseso ng pampublikong subasta.

Ayon kay Engineer Archie Orillosa ng Agham, hindi solusyon ang pagbili ng mga *generator* na hindi lamang masyadong magastos kundi aabutin pa ng ilang buwan bago gumana.

Sa halip, ayon kay Orillosa, dapat pagtuunan ng pansin ng National Power Corporation (NAPOCOR) ang rehabilitasyon ng mga planta ng enerhiya na matagal nang hindi namamaksimisa ang kapasidad dahil hindi mahusay na namanini ang mga ito. Inihalimbawa niya ang planta sa Pulangi, isa sa

pinakamalalaki sa Mindanao, na lumilikha lamang ng 50 *megawatt*, samantalang nasa 255 *megawatt* ang kapasidad nito.

Bukod dito, masyadong mahal ang produksyon ng kuryente gamit ang planong bilhing mga *generator*. Ayon mismo sa Department of Energy, posibleng tumaas nang hanggang 200% ang singil sa kuryente na lilikhain ng mga *generator*.

May hinala ang Agham na nais lamang ng rehimeng Arroyo na ilabas ang bilyun-bilyong pisong pondo para palihim na malustay ito niina Arroyo at kanyang mga alipures sa eleksyon.

## Lumalalang kahirapan at kagutuman, hindi na maitanggi

NAGDUDUMILAT ang katotohan sa kabila ng patuloy na pagtanggihan ni Arroyo na ang pangunahing maipapamana niya sa susunod na administrasyon at sa bayan ay ang umano'y mga repormang at kaunlarang pang-ekonomya na ibinunga ng kanyang pag-upo bilang presidente ng Pilipinas.

Sa totoo, sa ilalim ng halos sampung taon ng rehimeng US-Arroyo, dumanas ang bansa ng pinakamataas na antas ng kawalan ng trabaho kabilang na ang pagbaba ng kalidad ng mga trabaho at pagbaling ng milyun-milyong dating may regular na trabaho tungo sa pagiging mga malaproletaryadong wala o kulang sa trabaho. Naging mas malala ang pagkaatrasado ng kabuuang ekonomya ng bansa. Dumaos ang industriya at maging ang agrikultura. Dumaos sa sunud-sunod na mga krisis sa pinansya ang pamahalaan. Rumurok ang utang ng guberno at halagang inilalaan sa bayad-utang. Pinakamalaki ang nabawas sa mga serbisyong panlipunan. Walang ginawa ang rehimen sa harap ng matinding epekto ng pandaigdigang krisis sa lokal na ekonomya kundi maglaan ng kunwa'y malalaking *stimulus fund* (pondong pampasikad) na kinurakot lang naman ng naghaharing pangkatin.

Wala ring naitulong sa mamamayan ang rehimen sa harap ng matitinding mga sakuna at kapinsalaang tumama sa kanila. Pinakamatarik ang pagbagsak ng kabuhayan ng nakararaming pamilya habang tumataas ang presyo ng pagkain, langis, kuryente at iba pang saligang pangangailangan nila. Ibayong lumala ang


kahirapan at kagutuman. Ngunit patuloy lamang na sinisikap ikubli ng rehimen ang mga ito.

Namilipit sa pagpapaliwanag ang mga upisyal ni Arroyo nang banggitin ni Albay Gov. Joey Salceda, tagapayo sa ekonomya ng presidente, na mula 2001 ay lalong nalugmok sa hirap ang dati nang mga naghihirap, habang mas yumaman ang mga dati nang mayayaman.

Kahit sa minamanipulang estadistika ng National Statistics Office, lumalabas na halos dumoble ang nagsasabing mas nagugutom at naghihirap ngayon kaysa noon, mula 11.4% noong 2000 tungong 20.3% noong 2009.

Kung tutuusin, ang mga estadistikang ito ng NSO ay malayo sa katotohanan na higit na nakararaming mga Pilipino ang dumaranas ng kahirapan. Nagagawa ng guberno na paliitin ang datos ng kahirapan sa pamamagitan ng pagbababa sa pamantayan ng kahirapan. Sa harap ng nagdudumilat na kahirapan, nangangatwiran pa ang mga upisyal ni Arroyo at sabihing hindi talaga maiiwasan na magkaroon ng pagkakaiba ng kita kasabay ng paglago ng ekonomya. Mayroon naman umanong mga programa ang rehimeng Arroyo para sa mahihirap gaya ng pamimigay ng ayuda, murang bigas at gamot at libreng pagpapaaral.

Subalit ang totoo, ang mga ito'y nagsilbi lamang na palabigasan ng mga upisyal ni Arroyo at walang saysay sa pagbibigay ng makabuluhan o kahit panandaliang ginhawa sa mamamayan.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 6  
Marso 21, 2010  
[www.philippinerevolution.net](http://www.philippinerevolution.net)

Editorial


# Puspulang ilatag ang mga rekisito para abutin ang estratehikong pagkapatas

**U**maalingawngaw sa bawat sulok ng buong bansa ang tagumpay ng taktikal na opensiba ng mga Pulang mandirigma sa Mansalay, Oriental Mindoro noong Marso 6. Labinlimang pasistang tropa ang nalipol at pito ang nasugatan. Mahigit 15 malalakas na armas ang nasamsam mula sa kaaway at naidagdag sa arsenal ng hukbong bayan. Malugod na ipinagdiriwang ang tagumpay na ito hindi lamang ng mamamayan ng Mindoro, kundi ng buong sambaya-

nan. Nagbigay ito ng inspirasyon at tulak sa buong rebolusyonaryong kilusan na puspusang isulong ang demokratikong rebolusyong bayan hanggang sa tagumpay. Makabuluhan ang tagumpay na ito at iba pang taktikal na opensiba laluna sa harap ng papalapit na ika-41 anibersaryo ng Bagong Hukbong Bayan.

Dinudugtungan at pinatatampok ng mayor na tagumpay ng BHB sa Oriental Mindoro ang sunud-sunod na mga tagumpay ng BHB mula simula ng taon sa iba't ibang panig ng bansa. Rumagasa ang matatagumpay na mga taktikal na opensiba ng BHB sa Abra, Kalina, Mountain Province, Bulacan, Quezon, Palawan, Albay, Camarines Sur, Catanduanes, Sorsogon, Masbate, Eastern Samar, Negros, Agusan del Norte, Agusan del Sur, Surigao del Norte, Surigao del Sur, North Cotabato, Compostela Valley, Davao Oriental, Davao del Sur at iba pang mga prubinsya sa buong bansa.

Matingkad na inilalarawan ng kabitang mga tagumpay na ito ang kabitang ng kontra-rebolusyonaryong kampanyang Oplan Bantay Laya (OBL) ng rehimeng US-Arroyo at Armed Forces of the Philippines (AFP). Sa kabila ng natamo nating sugat sa harap ng matindi at susteni-



**Mga tampok sa isyung ito...**

Elite forces ng militar, nilipol ng BHB sa Mindoro  
PAHINA 4

Morong 43, patuloy na ginigipit  
PAHINA 5

Hacienda Luisita, di bibitiwan ng mga Cojuangco  
PAHINA 12

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)